



La presidenta dall'uniun digl Museum local Vaz, Marlies Eugster alla vernissascha da dumengia passada cun Jean-Claude Cantieni, tgi ò messa a strada igl contact cun Ferdinand Parpan.

Igl antier regal an eneda

pb. Ferdinand Parpan è en feagl dad emigrants da Vaz. El è mort igl 2004 cun 102 onns a Paris. Scu vaschign d'onour digl cumegn da Vaz, ò el regalo igl 2002 an ota vigliadetna 121 objects agl Museum local Vaz.

Dumengia passada è stada la vernissascha ainten la Sala Parpan.

Igls perdavants da Ferdinand Parpan èn emigros an Italgia. Ensacuras è igl bab rivo a Paris. Ferdinand Parpan è davanto artist ed ò luvro ena lunga veta principalmaintg scu sculptour ainten la capitala dalla Frantscha.

A Vaz èn igls davos decennis diversas persungas s'occupadas dalla perscrutaziun digls emigrants. Egn dad els è Jean-Claude Cantieni. Ed ensacu ins è er rivo sen Ferdinand Parpan ed ò piglia se contact e fatg ad el ena visita. Avertia da sia derivanza da Vaz, è igl scharmant Franzos Grischun s'interesse pi ferm per sia patria d'origen ed igl matg 2001 an l'ota vigliadetna da 99 onns è igl sculptour sto a Planeiras sen visita. Cun chella occasiun ò el survagnia igl vaschinadi d'onour.

Quasi scu rancunaschientscha ò Ferdinand Parpan fatg igl 2002 en generous regal a sies cumegn d'onour cun surdar 121 sculpturas e maletgs. Ena delegaziun da Vaz ò dastgea far la tscherna aint igl atelier a Paris ed ins ò transpurto la custevla fitgira a Vaz.

Ainten la Sala Parpan

Igl artist è alloura mort igl onn 2004. Chels da Vaz on lia render onour ad el e construia a Vaz Zorten tranter la tgesa e la clavadeira digl Museum local Vaz, ena annexa tgi ins ò numno Sala Parpan. Chella sala n'è pero betg schi gronda. Ella duess sarveir per exposiziuns lateralas digl museum tgi mossa permanentamaintg l'antiera cultura purila digls decennis e tschentanners passos ainten la tgesa e la clavadeira. Ins ò er gia exponia sculpturas da Ferdinand Parpan, pero adegna angal ena pitschna selecziun. Per solit an cumbinaziun cun artists contemporans digl li.

La suprastanza dall'uniun digl Museum local Vaz, actualmuintg presidiada da Marlies

Eugster, ò adegna gia igl giaveisch da leir mussar eneda igl antier regal da Ferdinand Parpan. Vot deir tots 121 objects tgi èn rivos a Vaz. Toni Parpan scu commember dalla suprastanza dall'uniun ò piglia an mang dad organisar e realisar ena exposiziun cumplessiva digl regal digl sculptour da Paris. Chegl n'è betg sto schi simpel causa dallas relaziuns restranscheidas digl spazi. Pero ins ò gist via ainten chellas relaziuns ena parallela tar igl atelier da Ferdinand a Paris, noua tgi igls objects eran deponias sur ples etaschas sen en spazi relativamaintg strètg.

Digl reminent èn tot igls objects dalla donaziun cataloghisos. Mintga object porta igl tetel original tgi igl artist veva do. «I vagn eneda er ampruo da metter igls tetels digls objects an tudestg. Gl'è pero betg schi simpel da transponer dad en lungatg ainten l'oter e tuttegna tigneur l'originalitad», ò managea Jean-Claude Cantieni tgi è sto alla testa dalla delegaziun tgi è stada a Paris ed è er participo da maniera decisiva ainten la tgira digl regal. Chegl tgi ins so anc betg è, tge tgi duess capitar cun tot igls 121 objects siva l'exposiziun tgi cozza anfignen la fegn favrer.

Las pi diversas materialias

Ferdinand Parpan era en artist cun bleras facettas. Schibagn puncto tematicas tgi el ò piglia per la realisaziun da sias sculpturas e maletgs scu er puncto grondezza e materialias catta insa tot las variaziuns. E tuttegna ins canoscha spertamaintg igl sies stil. Detagls svaneschan e l'expressiun centrala domineschan an spezial las sculpturas. Tgi el vegia alloura luvro cun metal, cun lenn, cun crap u cun cheramica, las sculpturas èn savens glischas e cun conturas radondas. Er er schi digl material e dalla furma annò èn las figuras mecta staticas, schi on ellas tuttegna ferma expressiun dinamica. Tematicas tgi vignan avant savens tar Ferdinand Parpan, èn persungas e l'ò cun predilecziun musicists ed alloura animals e l'ò ò igl elefant ena muntada dominante. Tiers tgi igl artist è per regla sa restanschia sen igl essenzial, ins catta tar el er sculpturas tgi mossan per exampel igl carstgang an sies esser natural, figuras classicas.

Igl Museum local Vaz è avert mintga mesemda e gievgia scu er la davosa dumengia digl meis mintgamai dallas 13.30 - 17.00.